

پنجابی باراں ماہ دا ادبی پچھوکڑ

☆ ڈاکٹر سعید خاور بھٹا

Abstract:

In this article the writer has described the literary background of Punjabi Baran Mah. He has also pointed out the roots of Baran Mah in different local languages of Pakistan. For this purpose he has kept before him the old literary traditions of Punjabi language. Besides this, he has also discussed the structure and subjects of Baran Mah. Thus this article covers the tradition of Baran Mah in its entirety.

بر عظیم پاک و ہند اُتے چراں تیکر بدلیسی راج رہے ہن تے اتھھے بدلیسی بولیاں نوں
سرکاراں تھاپڑ دیاں وی رہیاں ہن۔ ایہناں وچوں سنسکرت تے فارسی دے راج بولیاں ہوون دی
تاریخ لمیری ہے۔ دوویں اپنے ورثے دی امیری پاروں چڑھدے دا ائملا سرمایہ ہن۔ سنسکرت
دیاں جڑھاں آریہ دی تاریخ وچ ہن تے فارسی بھاویں ایران دی راج بولی ہے پر وسط ایشیا تے
جنوبی ایشیا وچ ایہدی وی چنگی چڑھ مچی۔ ایہناں دوواں بولیاں وچ لکھتاں دے ڈھگ لگے پئے
ہن۔ اڄ جدوں اساڈے دیسی کھوجی اپنیاں بولیاں دے مونہواں اُتوں ہزاراں ورھیاں دی دھوڑ

☆ ایسوی ایٹ پروفیسر، شعبہ پنجابی پنجاب یونیورسٹی ادبی اینٹل کالج، لاہور

پوچھن دا جتن کر دے ہن تاں اوہناں نوں ہزار ورھے توں پچھانہہ دیسی لکھت دی دس نہیں پیندی
تاں اوہ اچیتی یاں سچیتی فارسی تے سنسکرت دے خزانیاں دی پھولا پھالی کرن ٹر پیندے ہن۔ جے
کائی ماڑی موٹی تند جڑ گئی تاں دیسی ریت ایہناں دی ای دین ہوگئی۔

ایہہ منی پرمنی حقیقت ہے کہ آریہ دے برعظیم اُتے ہلیاں توں پہلاں استھہ ہڑپا تے
مونہجوڈو ورگے وسیب سکھراں نوں چھوہ رہے ہان۔ اوہناں دے جیون دے جی کجج دا بھرواں
ثبوت اج وی ایہہ بھڑ ہن۔ کچھ نویں کھوج کار آریہ والی وچار دھارا دے تاہر ہن تے اوہناں نوں
دیسی ثابت کرن لئی دلیلاں دے رہے ہن، پر ”رگ وید“ وچ پنجابیاں تے آریاواں دے یدھاں
دا ویر واملدا ہے تے ایہتھوں دے جیون رنگ ڈھنگ بارے اوہناں دیاں سٹھاں، پھٹکاں تے
جساں توں ایہہ نظر پیندا ہے کہ اوہ کسے ہور جوہ دے جم پال ہان۔ آریہ پشو پال ہان تے پنجابی
واہی وان۔ پنجابی اوہناں دے نالوں ویسی پکھوں ہک پیراگانہہ ہان۔ آریہ جت گئے تے
اوہناں پھیر ہزاراں ورھیاں تیکر راج کیتا۔ آریہ دے راج نال نہ ایہتھوں دیاں بولیاں مک
سکیاں تے نہ ای ایہتھوں دی سوجھ۔ انجیں وانگوں ٹرکاں، پٹھاناں دے راج سے وی فارسی راج
گدی تے بیٹھی پر دیسی سوجھ نوں اوہ وی نہ مکا سکی۔ سرکاری بولیاں دے پرچھاویں تاں دیسی
بولیاں اُتے پیندے رہے ہن، پر ایہناں دا اندرلاست اپنا ای رہیا۔ اساڈا اپنا کیہ ہے تے
ماگواں کیہ ہے؟ ایہتھوں تارن کان دیسی ورثے دی اندرلی سانجھ راہیں ای کسے سٹے اُتے اڑیا
جاسکدا ہے۔

ایس دھرتی دی ہزاراں ورھیاں پہلاں دی سوجھ تیکر اپڑن دا ہک ذریعہ ایہتھوں دا لوک
ادب ہے۔ ایس تانی وچ کئی انجیہیاں تنداں ہن، جیہناں دا وکھریاں اج وی دسدیا پیا ہے۔
ہزاراں ورھیاں بدیسی سوجھ دے راج مگروں وی ایہدا آ پانہیں ملکیا۔ ایہہ سنسکرت تے فارسی
دیاں ہنڑاں تے موضوعاں نال کھیہندی اچے وی بڑھی نہیں ہوئی۔ ایہدی اک کچی مثال
اساڈے لوک گاوناں وچ باراں ماہ دی ہوند ہے، جو اساڈے اجتماعی لاشعور دا حصہ ہے۔ ایسے
لوک گیت دی ینہہ اُتے اساڈے کئی کلاسیکی شاعراں فنی فکری عمارت اُساری ہے۔

پنجابی کھوجی پیارا سٹلہ پدم ہوراں ”پنجابی باراں ماہ“ دے سرناویں تھلے ہک باراں ماہ
دی چون کیتی ہے۔ ایہدے مڈھ وچ اوہناں باراں ماہ دی شاعری اُتے وی چائن پایا ہے۔
اوہناں یارھویں بارھویں صدی دے لہور وایا شاعر مسعود سعد سلمان دے فارسی دیوان نوں وی
گوکھیا ہے۔ مسعود دے سمکالی نظامی عروضی سرقندی ہوراں اوہناں دے ہندوی دیوان دی دس

پائی ہا، جیہڑا اے تیکر چھیتی یاں ان چھیتی روپ وچ ساہنے نہیں آیا۔⁽¹⁾ اوہناں مسعود سلمان دے فارسی دیوان بارے لکھیا ہے:

”ایس وچ مینوں مسعود اُتے پئی پنجابی یاں ہندوستانی ادب دی چھاپ تاں واضح ای دس پئی کہ اوس ساڈے شعری روپاں توں متاثر ہو کے باراں ماہ، اک ماہ (مہینہ دن) تے ستوارے فارسی وچ لکھے ہن، پر جدوں باراں ماہ دا تجزیاتی مطالعہ کیتا گیا تاں اوہ فطرت دی تصویر کشی یاں برہوں بیان دی تھیں اپنے بادشاہ ملک ارسلان دی تعریف ای پیش کر رہیا سی۔ مسعود قصیدہ گو شاعری۔ ملک ارسلان (عہد حکومت 509-511ھ) بارے اوس دا ایہہ باراں ماہ وی اک قصیدہ ای سمجھنا چاہیدا ہے۔“⁽²⁾

فارسی وچ باراں ماہ دی صنف دی تاں کوئی ہوند نہیں، پر مسعود سعد سلمان دی شاعری مگروں وی ایہہ ریت فارسی وچ اگے نہ ٹسکی۔ پدم ہوراں فارسی مگروں سنسکرت دے کھرے پے ہن تے اوتھے اوہناں نوں کھٹ رتو ورنن پنجابی نال لگا کھاندی جانی ہے۔ پدم ہوراں دے آکھن موجب:

”پنجاب وچ باراں ماہ دی شعری ریت اک ہزار ورھے پرانی ہے۔ سارا قدیم ادب میسر نہ ہوون پاروں اساڈے لئی ایہہ دسنا تاں مشکل ہو رہیا ہے کہ کس سٹیج اُتے آ کے کھٹ رتو ورنن نے باراں ماہ داروپ دھاریا۔“⁽³⁾ پدم ہوراں مگروں ایشر سنگھ تاگھ، ڈاکٹر رتن سنگھ جگی تے ڈاکٹر کلدیپ سنگھ دھیر ایسے راہے پے ہن۔ ایشر سنگھ تاگھ ہوراں دے وچار ویکھو:

”ایس طرح رُتاں دی پنڈ بھومی وچ شنگار رس دا چترن کیتا جاندا سی۔ ایہہ پر پڑا اگے چل کے بارہاں ماہ دے روپ وچ وکست ہوئی۔“⁽⁴⁾ ڈاکٹر رتن سنگھ جگی ہوراں وی ایہناں دے نال رلدی ملدی گل کیتی ہے:

”بارہاں ماہے نالوں وی پہلاں کھٹ رتو ورنن ہوندا رہیا ہے۔ ایس داناں مگروں رُتی بن گیا۔ سال دیاں چھ رُتاں مگروں ایہی گائَن ہر مہینے نال لایا گیا تے سال دے بارہاں مہینیاں انوسار ہون والی کوتا نوں بارہاں ماہ داناؤں دتا گیا۔“⁽⁵⁾

ڈاکٹر کلدیپ سنگھ دھیر ہوریں وی ایسے سٹے تے جے ہن:

”بارہاں ماہ کا وروپ دا وکاس بھارتی ساہت وچ پراپت کھٹ رتو ورن
جاں رتی کا وروپ وچوں ہویا۔“ (6)

اساڈے کھوجیاں پنجابی باراں ماہ دی ریت نوں سنکرت دی صنف کھٹ رتو ورن نال
جوڑیا ہے۔ کھٹ رتو ورن دی ریت سنکرت تے اپ بھرنش وچ دکھائی دیندی ہے۔ ایتھے ایس
پہلاں اوہناں دا وروپ دیندے آں تے ایہدے مگروں کسے اُتے اپڑن دی کوشش
کریاں۔

سنکرت وچ کھٹ رتو ورن ناں دی ہک شعری صنف لہدی ہے۔ ایہدے وچ چھ
رتاں بسنت (چتر و ساکھ) گریشم (جیٹھ ہاڑ) ورشا (ساون بدرو) سرد (اسوکتیں) ہیمنت (مگھر
پوہ) تے ششور (ماہ پھگن) دا وروپ لہدا ہے۔ سنکرت دے کئی شاعراں نے شکنتلا، بسنت سینا،
پاروتی تے دوجیاں ہیروئیاں دے مونہوں رتاں دے بدلن نال کام نوں بھڑکدیاں دکھایا ہے۔
ایہہ رتاں پنڈے کان کیہو جیہے سنیہے لے آوندیاں ہن۔ ایہدے بیان سے سنکرت دے شاعراں
قدرت دی اجیہی مورت دکھائی ہے کہ خورے ناویں شعری ریت ای منظر اں دے بیان پاروں
ایہدے موہرے کھلو سکے۔

سنکرت مگروں اپ بھرنش وچ کھٹ رتو ورن تے باراں ماہ دوویں لہدی ہن۔ اپ
بھرنش وچ ”سنیہہ راسک“ ناں دی ہک لکھت لہدی ہے، جیہدا شاعر ادہ مان ہے۔ اوس اپنا تخلص
ایہی ورتیا ہے۔ ڈاکٹر ہیرالال میٹھواری (7) تے ڈاکٹر بنارس داس جین ہوراں ایہدا اصل ناں
عبدالرحمن دسیا ہے۔ بنارس داس ہوراں دے آکھن موجب:

”عبدالرحمن کیلئے نظم میں اُدہ مان لکھا ہے۔ لیکن تشریحوں میں عبدالرحمن
ہے۔“ (8)

”سنیہہ راسک“ دی ہیروئن دا پتی کھمبات شہر سوداگری تے گیا ہے۔ اوہدی سوانی پتی
دیاں یاداں نوں سینے نال لا کے ویلا دھک رہی ہے۔ اوڑک بے وس تھیندی ہے تے اپنے گھر
دی چھت اُتے کھلو جانندی ہے۔ اوہنوں ہک پاندھی نظر بندا ہے۔ اوہ دسدا ہے کہ اوہ کھمبات جاندا
پیا ہے۔ کھمبات دا ناں سن کے اوہ اپنے پتی ول سنیہا گھلدی ہے۔ ایس سنیہے وچ چھ رتاں دا
ورن (بیان) لہدا ہے کہ کیویں پھلاں ورگی تیج سولاں دا بستر بن گئی ہے۔

”سنیہہ راسک“ مگروں اپ بھرنش وچ کھٹ رتو ورن تے باراں ماہ دوویں لکھے جان
لگ پئے۔ اپ بھرنش وچ سبھ توں پرانا باراں ماہ بارہویں صدی دا دسیا جاندا اے۔ ڈاکٹر پرکاش

مونس دے آکھن موجب:

”اپ بھرنش میں شٹ رٹو ورنن اور بارہ ماسے دونوں ملتے ہیں۔ عبدالرحمان کے سندیش راسک میں شٹ رٹو ورنن ہے لیکن جین اچاریوں نے لوک کتھاؤں اور عوامی روایتوں کا سہارا لے کر اپ بھرنش میں نہایت بلند مرتبہ بارہ ماسے لکھے ہیں۔ بارہ ماسے کی تصنیف سب سے پہلے بارہویں صدی عیسوی سے شروع ہوتی ہے۔ دستیاب بارہ ماسوں میں قدیم ترین بارہ ماسہ ”بارہ ناؤ“ کے نام سے ملتا ہے جو ایک جین سادھو جن دھم سوری کی تصنیف ہے۔ اس کا زمانہ تصنیف بارہویں صدی عیسوی کا نصف آخر ہے۔ اس کے بعد دوسرا بارہ ماسہ بھی ایک اور جین مونی نے چندر سوری کے مصنفہ ”نیمی ناتھ چٹش بدھ“ میں ملتا ہے۔ اس کا زمانہ تصنیف (1268-1309ء) کے درمیان خیال کیا جاتا ہے۔“⁽⁹⁾

ایہدے مگروں کئی دیسی بولیاں دے شاعراں نے کھٹ رتو ورنن تے باراں ماہ دوویں لکھے۔ راجستھانی شاعراں وچوں چندور دائی تے اودھی دے شاعر ملک محمد جاکسی دیاں لکھتاں سکھراں نوں چھوہندیوں کھالی دیندیاں ہن۔ ”آدگرنتھ“ وچ گوروارجن دیو دی اک رتی تے باراں ماہ کھالی دیندے ہن۔ رتی سنسکرت دے شبد رتو دا ای وگڑیا ہویا روپ ہے۔ اساڈی جاچے گوروارجن دیو ہوراں توں پہلاں یاں مگروں کسے ہور پنجابی شاعر دی رچی رتی اچے تیکر ساہنے نہیں آئی۔ انج رتی نوں پنجابی ریت نہیں آکھیا جاسکدا۔ رتی نوں گوروارجن دیو ہوراں دا شعری تجربہ آکھیا جاوے تاں غلط نہ ہوسی۔

جتھوں تیکر باراں ماہ دا سانگا ہے تاں ایہہ اچوکیاں دیسی بولیاں تے بولڑیاں وچوں راجستھانی، اودھی، ہرج، ہندی، آسامی، بنگالی، مٹیہلی، اڑیا، سندھی تے پنجابی وچ ایہہ ریت اپنیاں سکھراں نوں چھوہندی وکھالی دیندی ہے۔ ”انسائیکلو پیڈیا آف انڈین لٹریچر“ وچ دیسی بولیاں دی ایس ریت دا ویروا ملدا ہے۔ اتھتھے اسیں مثال وچوں کجھ بولیاں بارے دتیاں دساں دہراوندے آں۔

راجستھانی ریت بارے لکھیا ہے:

“The Rajasthani Barahamasa Poems depict the pangs of separation, and emotional feelings as experienced

by the female partner in each month of the year. The fact that these poems contain descriptions of emotions felt during the twelve months of the year accounts for the nomenclature of Barahamasa. The oldest available specimen of this genre is Neminath Chatuspadika of VinayChandra Suri, a Jaina poet. Composed in 'Chaupai', it is styled as Chatuspadika, and describes the feelings of separation, beginning with the month 'Sawana', as experienced by the heroine Rajmati. The poem was composed sometime in about 1260. Another such work of the 13th century is Nemi Barahamasa by the poet palhana.”⁽¹⁰⁾

بنگالی باراں ماہی بارے لکھیا اے:

“In Bengali literature, the number of Baramasyas belonging to the major two types is quite impressive. All the major streams of medieval Bengali literature produced some Baramasyas. In vaishnava literature the poems of this genre depict the sorrow of Radha and Bishnupriya when Krishna and Nimai left them behind, not to come back again. In the Mangalkavyas, however, Baramasyas on "Biraha, (desolation after the beloved's departure) where there, though the other type i.e. those centering round poverty, was more popular with the Mangal - poets.”⁽¹¹⁾

آسامی باراں ماہی بارے وچار پیش خدمت ہن:

“There is a class of songs in Assam as in other parts of eastern and northern India describing the twelve months of the year as a background to the feeling of a girl, whose husband is away somewhere. Such songs are known as Baramahi or ‘twelve - monthly’.” (12)

انج اُتے دسیاں ساریاں بولیاں وچ باراں ماہ دی ریت دکھالی دیندی اے۔ ایہناں بولیاں وچ باراں ماہ لوک گیت دی صنف دے طور تے تاں پرچلت رہے ای ہن، پر باقاعدہ شاعری دے نمونے بارہویں توں پندرہویں صدی دے سے توں ای ملدے ہن۔ ایہناں دے وچ دیسی مہینیاں دیاں موسمی کیفیتاں نوں من بیتیاں نال جوڑیا جاندیاں ہن۔ ایہناں دے وچ سال دا مڈھلا مہینہ وی اڈواڑ ہے۔ پنجابی باراں ماہ اکثر چیتڑ توں ای شروع ہوندے نیں۔ ایہناں بولیاں دے باراں ماہ وچ سوانی دا برہا اُچھا موضوع ہے۔ بھاویں باراں ماہ دے شاعر مردای ہن، پر ایہناں دے وچ الاسوانی دا ای ہے۔

پنجابی دے موڈھی شاعر بابا فرید ہوراں کول رُت گیان تاں دکھالی دیندا ہے پر ایہنوں باراں ماہ دا نمونہ نہیں آکھیا جاسکدا:

کنک کونجاں چیت ڈونہ ساون بجلیاں
سیالے سوہندیاں پر گل باہریاں (13)

پنجابی باراں ماہ دا سمجھ توں پرانا نمونہ بابا گورو نانک ہوراں کول ای ملدا ہے۔ اوہناں دیسی مہینے چیت توں شروع کر کے مہکن تیکر ہر مہینے برہا دیاں اڈواڑ کیفیتاں دسیاں ہن۔ باہرلا موسم من نوں کیویں بلوندا ہے تے وجوگن دا وجوگ اوہناں دے ہک ہک شہد وچوں پھندا ہے۔ اوہناں دی بولی تشبیہاں، استعاریاں نال پرچی ہوئی ہے تے کجھ مصرعے تاں اج اکھاناں وانگوں پرچلت ہن۔ اوہناں دی سوچہ موجب برہا وچ بھجی ناری گورمکھ ہو کے ای شانت ہو سکدی ہے۔ اتھے ساون دا مہینہ دیکھو:

ساون سرس مناگھن ور سہہ رُت آئے
میں من تن سہہ بھاوے پر پردیس سدھائے

پر گھر نہیں آوے مرے ہاؤے دامن چمک ڈرائے
 بیج اکیلی کھری دو پہلی مرن بھیا دکھ مائے
 ہر بن نیند بھوکھ کہو کیسی کا پڑتن نہ سکھاوے
 نانک سا سہاگنی کنتی پر کے انک ساوے (14)

بابا گورو نانک ہوراں توں امرتا پریتم تیکر سیٹکڑے سرکڈھویں پنجابی شاعراں باراں ماہ
 لکھے۔ ہُن ایہدے کلاوے وچ گویاں دا کرشن کان ولکن، سیتا دی رام لئی سک، آتما دا پر ماتما
 توں وچھوڑا، عشق رسول وچ ترفندے عاشق دی مدینے جاون دی اچھیا، کربلا وچ تسی اماماں دی
 اولاد، لوک داستاناں دیاں ہیر وناں دی متر نال ہک مک ہوون دی چاہت ورگے موضوع وی
 آگئے ہن۔ انج باراں ماہ دی پنجابی دے کلاسیکی ادب وچ اچھی تھاں ہے۔

جیویں اسیں پہلاں وچار چکے ہاں کہ آریہ دے آون توں پہلاں استھتھے جیوندے
 جاگدے وسیب ہاں تے آریہ اوہناں اُتے مل ماری۔ اوہناں دیاں بولیاں ای راج گدی دیاں
 سائنیاں بنیاں۔ سنسکرت ہزاراں ورھیاں تیکر راج کیتا۔ دیسی بولیاں دا وجود تاں ہمیش رہیا ہے،
 پر سرکاری بولیاں وانگوں اوہناں دی سانجھ نہ ہو سکی۔ انج دیسی ریت سینہ بہ سینہ اگے ٹردی دکھالی
 دیندی ہے۔ سنسکرت دے زوال مگروں دیسی بولیاں انگاڑی لیندیاں ہن تاں سنسکرت دے ورثے
 دی ای جگالی نہیں کردیاں سگوں اوہناں دے کول اپنی وی ہک سوچھ ہا۔ ایہہ نکھیر کھٹ رتو ورن
 تے باراں ماہ وچ سچ سبھا دکھالی دیندا ہے۔

جے باراں ماہ کھٹ رتو ورن دی ای ترقی یافتہ شکل ہے تاں پھیر ایہہ ہندوستان دیاں
 اینیاں بولیاں وچ کھو سے کیویں اُبھریا۔ سنسکرت دے کلاسیکی ادب دی ایہو صنف ای شمالی ہندی
 سانجھی ادبی قدر کیوں بنی ہے؟

دیسی بولیاں دے شاعراں چندور دائی، ملک محمد جائسی تے گورو ارجن ہوراں
 دوواں صنفان وچ لکھیا ہے۔ اوہ کیہڑی گل ہائی جیہڑی کھٹ رتو ورن وچ ناہی ہوندی تے
 اوہناں باراں ماہ دی ریت توں وی نبھایا ہے۔ ایہناں شاعراں نوں دکھو دکھ سرنادیں دیون
 دی کیہ لوڑ پئی؟

دیسی بولیاں دے سارے باراں ماہ وچ سوانی ولوں عشق دا اظہار کیتا گیا ہے، جیہڑا جی
 دے من وچوں رُگ بھر لیندا ہے۔ ایہہ سبھا مادری وسیب دی ای دین ہے۔ دیسی بولیاں وچ ایس
 اسلوب دے کئے ای نشا بھر شاعر دسدے ہن۔ فارسی تے سنسکرت ادب پدري وسیب دا نمائندہ

ہے۔ اوتھے اجیہا رنگ تھاں وی ناہی بنا سکدا۔ سنسکرت وچ پریکی دے من وچ پہلاں پریکا کان چنگ پیندی ہے تے پھیر سوانی اپنی وفا دا ثبوت دیندی ہے۔ کھٹ رتو ورنن وچ وسیاں دی سوچھ دا ایہہ نکھیر صاف پیا دسدا ہے۔

باراں ماہ دا مڈھلا موضوع برہا ہے۔ وجوگن ایسے اگ وچ سز دی رہندی ہے۔ ایس اگ داسیک شیداں وچوں نکل کے پڑھن ہاراں دیاں روحاں نوں وی نگھرا دیندا ہے۔ کھٹ رتو ورنن وچ عشق دا موضوع تاں ہے، پر اوتھے ناری بھوگ کان اُتاوولی ہے تے کدی کدی تاں ایس رُت وچ پچھلے کیئے بھوگ دی سینتر وی مار ویندی ہے۔

کھٹ رتو ورنن دی سوانی اُتلے میل دی ہے، جیہدے اگ وچوں کام بھٹدا ہے۔ اوہدے آل دوالے عیش دے دو جے سارے سامان موجود ہن، پر پریکی دی تانگھ کچے سبھ کچھ کھان نوں آؤندا ہے۔ باراں ماہ دی پریکا ماڑے میل دی وجوگن ہے جیہنوں پریم دی تانگھ لکھوں ہولیاں کر چھڈیا ہے۔

کھٹ رتو ورنن وچ سنسکرت دے شاعر اُن رتاں دی منظر نگاری کمال درجے دی کیتی ہے۔ باراں ماہ وچ وی باہریاں کیفیتاں نوں من دیاں سدھراں نال جوڑیا جاندا ہے، پردیسی شاعر اُن باہری منظر نگاری نالوں اندر لی اگ اُتے بہتا زور دتا ہے۔

اُتلے وچاراں نوں مکھ رکھ کے ایس آکھ سکدے آں کہ برہاتے سوانی ولوں عشق دا اظہار ایس دھرتی دی شاعری دے نویکلے گُن ہن، جیہدے سنسکرت ورگی کلاسیکی شاعری دا حصہ نہیں بن سکے۔ باراں ماہ، کھٹ رتو ورنن دی دین نہیں سگوں لوک ادب وچوں پھٹیا رنگ ای ہے۔ اج وی آسامی بولی وچ باراں ماہ نوں لوک ادب وانگوں ای مانیا جاندا ہے۔ باراں ماہ دی شاعری موضوع تے اسلوب پاروں اپنی وکھری پہچان رکھدی ہے۔



حوالے/حاشیے

- 1 پیارا سنگھ پدم، ”باراں ماہ“، سانجھ و چار، مرتب۔ سعید بھٹا (لہور: اے ایچ پبلشرز، 1997ء) 226۔
- 2 پدم 227۔
- 3 پدم 225۔
- 4 ایشر سنگھ تانگہ، ”باراں ماہ، راگ نکھاری تے ماجھ“، پنجابی دنیا؟ (1964ء): 64۔
- 5 ڈاکٹر رتن سنگھ جلی، ساہت کوش پر بھاشک شبد اولی (پٹیالہ: پنجابی یونیورسٹی، 1989ء) 745۔
- 6 ڈاکٹر کلدیپ سنگھ دھیر، پنجابی دے مولک تے پر نپراگت کا دروپ کار (پٹیالہ: پنجابی یونیورسٹی، 2001ء) 92۔
- 7 Dr. Hiralal Maheshwari, History of Rajasthani Literatur, (Delhi: Sahitya Akademi, 1980) 30.
- 8 ڈاکٹر بناری داس، ”عبدالرحمن کا سندیش راسک“، اورینٹل کالج میگزین، 23.88 (1947ء) 88۔
- 9 ڈاکٹر تنویر احمد علوی، بارہ ماسہ کی روایت (نئی دہلی: شاہد پبلی کیشنز، 2005ء) 23۔
- 10 “Barahamasa Rajasthani,” Encyclopaedia of Indian Literature, vol.I 1987 ed.
- 11 “Barahamasa Bengali,” Encyclopaedia of Indian Literature, vol.I 1987 ed.
- 12 “Barahamahi Assamese,” Encyclopaedia of Indian Literature, vol.I 1987 ed.
- 13 بابا فرید، آکھیا بابا فرید نے، مرتب۔ محمد آصف خاں (لاہور: پاکستان پنجابی ادبی بورڈ، 1978ء) 291۔
- 14 بابا نانک، کلام نانک بمعہ فرہنگ، ڈاکٹر جیت سنگھ سیٹل (پٹیالہ: بھاشا دہاگ 1971ء) 831۔